



Kiini cha Sheria

Ikumbuke siku ya Sabato uitakase.—**Kutoka 20:8.**

Katikati ya Amri Kumi kuna amri ya nne, kama ilivyotangazwa kwa mara ya kwanza: “Ikumbuke siku ya Sabato uitakase. Siku sita fanya kazi, utende mambo yako yote; lakini siku ya saba ni Sabato ya Bwana, Mungu wako, siku hiyo usifanye kazi yo yote, wewe, wala mwana wako, wala binti yako, wala mtumwa wako, wala mjakazi wako, wala mnyama wako wa kufuga, wala mgeni aliye ndani ya malango yako. Maana, kwa siku sita Bwana alifanya mbingu, na nchi, na bahari; na vyote vilivyomo, akastarehe siku ya saba; kwa hiyo Bwana akaibarikia siku ya Sabato akaitakasa” (Kutoka 20:8-11)....

Kristo alikuwa amefungua mlango, au huduma, ya patakatifu pa patakatifu, nuru ilikuwa inang’aa kutoka katika mlango ule uliofunguliwa wa hekalu la mbinguni, na amri ya nne ilioneshwa ikiwa imejumuishwa katika sheria ambayo imehifadhiwa mle; kile ambacho Mungu alikianzisha, hakuna mwanadamu angeweza kukipindua (Pambano Kuu, uk. 360).

Mungu ametupatia amri Zake, si tu ili ziaminiwe, bali pia zitiiwe. Yehova mkuu, alipoiweka misingi ya dunia, alikuwa ameuvisa ulimwengu wote vazi la uzuri, na alikuwa ameijaza na vitu vyenye manufaa kwa mwanadamu—Alipoumba maajabu yote ya nchi na bahari—alianzisha siku ya Sabato na kuitakasa. Mungu aliibariki na kuitakasa siku ya saba, kwa sababu Yeye alipumzika siku hiyo kutokana na kazi Yake yote ya ajabu ya uumbaji. Sabato ilifanyika kwa ajili ya mwanadamu, na Mungu alimtaka kuweka kando kazi yake siku hiyo, kama Yeye Mwenyewe alivyopumzika baada ya kazi Yake ya siku sita ya uumbaji.

Wale wanaoziheshimu amri za Yehova, baada ya nuru kutolewa kwao kuhusiana na kanuni ya nne ya Amri kumi za Mungu, wataitii bila kuhoji uwezekano au urahisi wa utii huo. Mungu alimuumba mwanadamu kwa mfano Wake mwenyewe na kisha akampa mfano wa kuitunza siku ya saba, ambayo alitukua na kuitakasa. Alipanga kwamba katika siku hiyo mwanadamu anapaswa kumwabudu Yeye na kujishughulisha katika shughuli zisizo za kidunia. Hakuna mtu ambaye anaidharau amri ya nne, baada ya kuwa ameelimishwa kuhusiana na madai ya Sabato, anaweza kuhesabiwa kuwa hana hatia mbele za Mungu...

Mwanzoni kabisa mwa amri ya nne, Mungu alisema, “Ikumbuke,” akijua kwamba mwanadamu, katika wingi wa shughuli na fadhaa zake, angejaribiwa kujitafutia udhuru wa kutotimiza matakwa kamili ya sheria, au katika msongo wa mambo ya kiulimwengu, angesahau umuhimu wake mtakatifu... Lakini anadai siku moja, ambayo ameitenga maalum na kuitakasa. Anampatia mwanadamu siku hiyo kuwa siku ambayo anaweza kupumzika kutoka katika kazi na kujitolea ili kuabudu na kuimarisha hali yake ya kiroho (Testimonies For The Church 4:247-249).